

प्रादेशिक समाचार
आकाशवाणी जयपुर—अजमेर

दिनांक 25.05.2024

समय: 18.45 बजे

00000

- प्रदेश मांय जबरदस्त गर्मी अर लू बीच फलौदी मांय पारो 50 डिग्री सैल्सियस ताई चढ्यो—12 जिलां सारू लू रो रेड अलर्ट जारी करी ज्यो।
- प्रदेश मांय अंगदान अर ऊपतू अंग लगावण सारू राज्य स्तर री सलाहकार समिति बणायी ज्यी— काल राज्य मांय 59वां अंगदान ऊं 3 जणां ने नुवी जिंदगी मिली।
- लोकसभा चुणाव रा छठा दौर रा तैत आज शांति सागे वोट पड्या।
- देश मांय एक जुलाई ऊं लागू व्हेवण वाळा तीन नुवा आपराधिक कानूनां रा बारा मांय जाणकारी देवण सारू आज ऊं जिला मांय कार्यशालावां राख्यी जा रही है।

0000

प्रदेश मांय ज़ोरदार गर्मी अर लू रा थपेड़ां रो सिलसिलो हाल ई चाल रह्यो है अर केई ठोड़ां पारो घणो चढ़ ग्यो है। राज्य रा आतूणी हलकां मांय लारला एक सप्ताह ऊं ज़ोरदार लू बाज रही है। मौसम विभाग रे मुजब प्रदेश मांय गर्मी रा तीखा तेवर आवता दिनां ई चालता रेहवण रा आसार है। मौसम केंद्र जयपुर रा निदेशक राधेश्याम शर्मा बतायो के प्रदेश रा 12 जिलां मांय घणी ज़ोरदार गर्मी सारू चेतायी ज्यो है।

.....

राज्य रा ऊगणी हलकां मांय ई तापमान 45 डिग्री सैल्सियस ऊं ऊंचो चाल रह्यो है। लारली रात अजमेर, जयपुर, कोटा, चित्तौड़गढ़, डबोक, बाड़मेर, जैसलमेर, जोधपुर, बीकानेर, चूरू, धौलपुर, जालौर अर डूंगरपुर मांय न्यूनतम तापमान 30 डिग्री सैल्सियस ऊं ऊंचो दर्ज करी ज्यो। टोंक, बांसवाड़ा अर राजसमंद मांय ई पड़ रह्या ज़ोरदार तावड़ा ऊं घणी परेशानी व्हे रही है। केई ठोड़ां गर्मी ऊं बचाव सारू सड़कां माथे तम्बू ताणी ज्या है अर कूलर लगायी ज्या है। जयपुर मांय ई कठे—कठे ट्रेफिक लाइटां कने रूकण वाळा स्कूटर—मोटरसाइकिलां अर गाड़ियां वाळां सारू छाया करण बाबत् तम्बू ताणी ज्या है। सरकार गर्मी ऊं बचाव सारू

खास बाजारां अर चौराहां माथे छाया-पानी री व्यवस्था करण रा हुकम ई दीना है। करौली, बूंदी अर जैसलमेर मांय दमकल रे जरिये सड़कां माथे पाणी रो छिडकाव करायी ज्यो। बाड़मेर रा जिला कलेक्टर जबरदस्त गर्मी ने ध्यान राखता थकां सगळा आंगनबाड़ी केन्द्रां मांय 3 ऊं 6 साल तांई उम्र रा बच्चां सारू 31 मई तांई छुट्टी रो ऐलाण कर दीनो है। **हनुमानगढ़** मांय ई जिला कलेक्टर आंगनबाड़ी रा बच्चां सारू 5 जून तांई छुट्टी रो ऐलाण कर दीनो है। **टोंक** मांय जिला कलेक्टर मनरेगा रा तैत काम रो बगत संवारे साढे पांच ऊं दोपहरां पाछे साढे बारह बज्यां तांई करण रा हुकम दीना है। **बांसवाड़ा** मांय संभागीय आयुक्त नीरज के पवन आज पंछियां सारू परिंडा बांध्या अर जनता ऊं ई परिंडा बांधण री अरज कीनी। ई बीचे **जयपुर** रा कुछ हलकां मांय आज सिंज्या छांटो-छिड़को व्हयो।

जयपुर रा राष्ट्रीय आयुर्वेद संस्थान रा एसोसिएट प्रोफेसर डॉ. सर्वेश कुमार अग्रवाल बतायो के छोटी-छोटी सावधानियां राख र लू ऊं बचाव कर्यो जा सके है।

एस.बी. डॉ. सर्वेश कुमार अग्रवाल

ई बीचे अजमेर विद्युत वितरण निगम री ओर ऊं बिजली ऊं जुड़ी शिकायतां आगी करण सारू कंट्रोल रूम बणायी ज्यो है।

अधीक्षण अभियंता अशोक कुमार बतायो के ग्राहक हेल्पलाइन नम्बर 01467-298625 माथे बिजली ऊं जुड़ी परेशानियां री जाणकारी दे सके है। दूजी कानी तेज गर्मी अर लू रा थपेड़ां बीचे बिजली री कटौती अर पाणी री कमी ऊं ई जनता ने परेशानी व्हे रही है। झालावाड़ रा चौमहला मांय बिजली कटौती रे कारण परेशान कारोबारी बाजार बंद राख्या।

000

ऊर्जा विभाग रा अतिरिक्त मुख्य सचिव उनाळा मांय सर्किल स्तर माथे बणायी ज्यो कन्ट्रोल रूम मांय ग्राहकां ऊं फोन माथे बात करण वाळा कर्मचारियां अर इंजीनियरां ने खास हुकम दीना है। वे कह्यो के कन्ट्रोल रूम ने ग्राहकां री शिकायतां दर्ज कर्यां पाछे खुद ई डिस्कॉम स्तर रा कॉल सेन्टर अर सम्बन्धित ऐइएन या जेईएन ने इण री जाणकारी देवणी व्हेला।

00000

राज्य सरकार मानव अंग एवं प्रत्यारोपण अधिनियम, 1994 रा तहत समुचित प्राधिकारी री मदद अर वां ने राय देवण सारू सलाहकार समिति बणायी है।

चिकित्सा शिक्षा विभाग री ओर ऊं जारी पानड़ी रे मुजब चिकित्सा शिक्षा विभाग रा सचिव री सदरत वाळी ई समिति मांय चिकित्सा शिक्षा आयुक्त सदस्य सचिव अर लॉ एंड लीगल अफेयर विभाग रा संयुक्त सचिव, सवाई मानसिंह मेडिकल कॉलेज मांय सुपर स्पेशियलिटी ब्लॉक रा मुखिया डॉ. विनय मल्होत्रा, न्यूरोसर्जरी विभाग रा सीनियर प्रोफेसर डॉ. मनीष अग्रवाल, रिटायर व्हे चुक्या आर.ए.एस. अहलकार ओ.पी. गुप्ता, कोटा री डॉ. नील प्रभा नाहर, मोहन फाउण्डेशन चेन्नई रा मैनेजिंग ट्रस्टी डॉ. सुनील श्रॉफ अर कांवटिया अस्पताल जयपुर रा प्रिंसिपल स्पेशलिस्ट डॉ. दिनेश शर्मा सदस्य व्हेला। आ कमेटी दो साल ताई काम करेला। ऑथराइजेशन कमेटी बणायां पाछे प्रदेश मांय अंगदान अर ऊपतू अंग लगावण रो काम ओजू मजबूती सागे सरु व्हे ग्यो है। चिकित्सा विभाग री अतिरिक्त मुख्य सचिव शुभ्रा सिंह बतायो के काल जयपुर रा एक गैर-सरकारी अस्पताल मांय प्रदेश रो 59वां अंगदान करी ज्यो। जयपुर रा रेहवासी 44 साल रा शुक्ला तेजस उपेन्द्र कुमार रे 21 मई 2024 ने व्ह्या हादसा पाछे 24 मई 2024 ने दिमागी तौर ऊं मरणरो ऐलाण कर दियो ज्यो हो। ई पाछे डॉक्टरां री समझाइश ऊं वां रा पिरवार वाळा उपेंद्र कुमार रा अंग दान करण सारु राजी व्हे ग्या। ई पाछे एक गुर्दो अर लिवर सवाई मानसिंह अस्पताल जयपुर मांय भिजवायी ज्या अर एक गुर्दो गैर-सरकारी अस्पताल मांय दूजां रे लगायी ज्यो। इण भांत उपेन्द्र कुमार तीन जणां ने जीवनदान दीनो।

00000

लोकसभा चुनाव रा छठा दौर रा तैत 58 सीटां सारु आज सिंज्या पांच बज्यां ताई 58 फीसदी ऊं बत्ता मतदाता वोट देवण रो हक इस्तेमाल कर लीनो हो। पश्चिम बंगाल मांय करीब 78 फीसदी, झारखंड मांय 61 फीसदी ऊं बत्ता, ओडिसा मांय करीब 60 फीसदी, हरियाणा मांय करीब 56 फीसदी, दिल्ली मांय लगभग 54 फीसदी, बिहार अर उत्तर प्रदेश मांय 52 फीसदी ऊं बत्ता अर जम्मू कश्मीर मांय 51 फीसदी ऊं बत्ता वोट पड्या। ओडिसा विधानसभा चुनाव रा तीजा दौर मांय ई आज करीब 60 फीसदी वोट पडबा रा समाचार है। ई बीचे लोकसभा चुनाव रा सातवां अर आखिरी दौर मांय एक जून ने पडबा वाळा वोटों सारु प्रचार रो काम जोर-शोर ऊं चाल रह्यो है। वोटों री गिणती 4 जून ने करी जावेला। वोटों री गिणती सारु राज्य मांय ई तैयारियां करी जा रही है। आज दौसा मांय वोटों री गिणती री ड्यूटी मांय लाग्योडा सात सौ ऊं बत्ता कर्मचारियां ने सिखावण दीरीजी। बांसवाडा मांय ई लोकसभा चुनाव अर बागीदौरा विधानसभा हलकां रा चुनाव सारु पड्या वोटों री गिणती बाबत तैयारियां करी जा रही है। वठे अहलकारां ने न्यारी-न्यारी जिम्मेदारियां सूप दीरीजी है।

0000

देश मांय एक जुलाई 2024 ऊं लागू व्हेवण वाळा तीन नुवा आपराधिक कानूनां रा बारा मांय जाग जगावण सारू प्रदेश मांय ई आज ऊं न्यारी-न्यारी ठोडां कार्यशालावां राख्खी जा रही है।

राजस्थान न्यायिक अकादमी री ओर ऊं राख्खी जा रही आं कार्यशालावां मांय न्यायिक अधिकारियां सागे वकीलां, पुलिस रा अहलकारां अर कर्मचारियां ने सिखावण दी जा रही है। आज अलवर मांय कार्यशाला राख्खी ज्यी। अलवर रा जिला अर सत्र न्यायाधीश हरेन्द्र सिंह बतायो के कार्यशाला मांय संसद कानी ऊं पास करी ज्या भारतीय नारिक सुरक्षा संहिता, भारतीय न्याय संहिता अर भारतीय साक्ष्य अधिनियम रा बारा मांय विगतवार जाणकारी दीरीजी।

.....

कोटा मांय ई आज दो दिन रो सिखावण कार्यक्रम सरू व्हयो।

0000

भ्रष्टाचार निरोधक ब्यूरो रा महानिदेशक रवि प्रकाश मेहरड़ा जनता ऊं भ्रष्टाचार रे खिलाफ लड़ाई मांय सरकार रो साथ देवण री अरज कीनी है। वे बतायो के ए.सी.बी. री हैल्पलाइन रा नम्बर 1064 अर व्हाट्सएप नम्बर 94135-02834 माथे शिकायत करी जा सके है। वे कहयो के जनता सरकारी कर्मचारियां कानी ऊं घूस मांगण, ओहदा रो बेजा इस्तेमाल करण अर आमदनी ऊं बत्ती सम्पत्ति ऊं जुड़ी शिकायतां आं नम्बरां माथे कर सके है।

0000